

- IV. ADMINISTRACIÓN LOCAL - IV.2 MUNICIPAL - PORTO DO SON

ANUNCIO Pág. 13941 Reg. 13566-x.

Anterior

Siguiente

Ordenanzas fiscais

Aprobación definitiva ordenanzas fiscais

O Pleno do Concello De Porto do Son, en sesión extraordinaria celebrada o 8 de novembro de 2003, acordou aprobar provisionalmente o establecemento e modificación das ordenanzas que de seguido se relacionan. Unha vez expostas o público polo período de trinta días hábiles mediante anuncio publicado no Boletín Oficial da Provincia de 15 de novembro de 2003, sen que durante o referido período se presentasen reclamacións, élévanse a definitivos os referidos acordos, e procédese a publicación do seu textos íntegro, de acordo co disposto no artigo 17.4 da Lei 39/88, Reguladora das Facendas Locais.

ORDENANZA REGULADORA DA TAXA POLA PRESTACIÓN DO SERVICIO DE RECOLLIDA E TRATAMIENTO DE RESIDUOS SÓLIDOS URBANOS

CAPÍTULO 1º .-FUNDAMENTO, NATUREZA E FEITO IMPOÑIBLE

Artigo 1.-Fundamento e Natureza.

No uso das facultades concedidas polos artigos 133.2 e 142 da Constitución e polo artigo 106 da Lei 7/1985, de 2 de abril, reguladora das Bases de Réxime Local, en relación cos artigos 149 e seguintes, 137 e seguintes da Lei 5/97 do 22 de xullo, de Administración Local de Galicia, e de conformidade co disposto nos artigos 15 a 20 da Lei 39/1988, de 28 de decembro, reguladora das Facendas Locais, modificada pola Lei 25/1998 do 13 de xullo, de modificación do Réxime Local das taxas estatais e locais e de reordenación das prestacións patrimoniais de carácter público, o Concello de Porto do Son establece a Taxa pola prestación do servicio de recollida e tratamento de residuos sólidos urbanos, á que se refire o artigo 20.4 s) da Lei 39/88 que se rexerá pola presente Ordenanza Fiscal, con normas que atenden ó prevido no artigo 58 da devandita Lei 39/1988, modificado así mesmo polo artigo 66 da Lei 25/1998 do 13 de xullo.

Artigo 2.-Feito Impoñible.

1. Constitúe o feito impoñible da taxa a prestación do servicio, de recepción obligatoria, de xestión de lixo domiciliario e residuos sólidos urbanos de vivendas, aloxamentos,

locais e establecementos onde se exerzan actividades comerciais, industriais, profesionais, artísticas, de servicios ou calesquera outras de carácter meramente social efectuadas sen contraprestación.

2. A xestión de residuos comprende as fases de prerecollida, recollida e tratamento.
3. A tal efecto, considéranse lixo domiciliario e residuos sólidos urbanos ós restos e refugallos de alimentación ou detritos procedentes da limpeza ordinaria de vivendas ou locais, excluíndose de tal concepto os residuos de tipo industrial, e materiais de obras, detritos humanos, materias e materiais contaminados, corrosivos e perigosos, e que a súa recollida ou tratamento esixa a adopción de especiais medidas hixiénicas, profilácticas ou de seguridade, tal e como establece a lei 10/1990 de 24 de Abril.
4. Os residuos excluídos do concepto de residuos sólidos urbanos, conforme o sinalado no apartado anterior haberán de ser retirados por aquelas persoas ou entidades que os produzan ou depositen e, no caso de non facelo, os servicios deste Concello realizarano á súa costa e sen prexuízo das posibles sancións. Do mesmo xeito, os mobles, utensilios e trastes inutis deberán ser depositados polas persoas ou entidades que os produzan no Punto Limpo establecido a tal efecto na Planta de Compostaxe da Mancomunidade de Concellos da "Serra do Barbanza", entidade local en que está integrado este Concello para a xestión mancomunada dos residuos sólidos urbanos.

CAPÍTULO 2º .-SUXEITOS PASIVOS E RESPONSABLES.

Artigo 3.-Suxeitos pasivos

Son suxeitos pasivos contribuíntes as persoas físicas ou xurídicas e as entidades as que se refire o artigo 33 da Lei Xeral Tributaria, que ocupen ou utilicen as vivendas e locais emprazados nos lugares, prazas, rúas ou vías públicas nos que se preste o servicio, xa sexa a título de propietario ou calquera outro: usufructuario, habitacionista, arrendatario ou mesmo de precario.

Artigo 4º .-Substituto do contribuínte.

Terá a consideración de suxeito pasivo substituto do contribuínte, o propietario das vivendas ou locais, así como as Comunidades de Propietarios -ás que poderán xirarse a totalidade das cotas que correspondan o inmoble-, sen prexuízo de que uns e outros, no seu caso, podan repercuti-las cotas satisfeitas sobre os usuarios, beneficiarios do servicio, conforme o artigo 23.2 a) da Lei 39/1988, de 28 de decembro, Reguladora das Facendas Locais.

Artigo 5º .-concorrencia de suxeitos pasivos.

A concorrencia de dúas ou máis persoas físicas ou xurídicas ou entidades ás que se refire o artigo 33 da Lei Tributaria na posición de suxeitos pasivos, determinará a responsabilidade solidaria dos concorrentes fronte á Facenda do Concello.

Artigo 6º .-Outros responsables.

1. Responderán solidariamente das obrigacións tributarias do suxeito pasivo, as persoas físicas ás que se refiren os artigos 38.1 e 39 da Lei Xeral Tributaria.

2. Serán responsables subsidiarios os administradores das sociedades e os síndicos, interventores ou liquidadores de quebras, concursos, sociedades en xeral nos supostos e co alcance regulado no artigo 40 da Lei Xeral Tributaria.

CAPÍTULO 3º .-BENEFICIOS FISCAIS.

Artigo 7º .-Exencións.

De conformidade co ordenado no artigo 9 da Lei 39/1988, de 28 de decembro, Reguladora de das Facendas Locais, non se concederá ningunha exención no pago da taxa, salvo que por Lei estatal ou en cumprimento de Tratados Internacionais se establecese outra cousa.

Artigo 8º .-Reduccións na Cota.

1. Ó abeiro do establecido no art. 24.4 da Lei 39/1988, a cota da tarifa reducirase nun 50% para aqueles suxeitos pasivos nos que concorra a condición de xubilados, pensionistas ou perceptores de axuda familiar, sempre que os seus ingresos anuais totais non superen o salario mínimo interprofesional vixente no período para o que se solicite a reducción.

Dita reducción non será aplicada si tódalas persoas que teñen a residencia habitual na mesma vivenda teñen en conxunto uns ingresos anuais totais superiores o salario mínimo interprofesional vixente no período para o que se solicite a reducción.

Mediante Decreto de Alcaldía se recoñecerá previo informe dos servicios técnicos do Concello o dereito de reducción mencionado anteriormente, previa solicitude do interesado e aportación acreditativa na que conste a condición de xubilado, pensionista ou perceptor de axuda familiar, o importe da pensión ou axuda disfrutada, e a circunstancia de estar ó corrente no pago da taxa, aplicándose este beneficio no recibo correspondente. O impago dos recibos implicará a perda da reducción aplicada, prexudicando ó dereito do exercicio corrente.

Na liquidación de cada exercicio, O Concello coñecerá dos contribuíntes beneficiados e importes reducidos, podendo revocar se da práctica das actuacións inspectoras se deducira a súa improcedencia.

2. Gozaran así mesmo dunha reducción do 50% na cota da taxa aquelas vivendas e locais emprazados no ámbito rural onde non exista un colector de recollida do lixo nun radio de 400 metros contados a partir de calquera punto do edificio, construción ou local onde se empraza a vivenda ou se realiza a actividade

3. Gozarán tamén dunha reducción do 10% da taxa aqueles contribuíntes que residan en zonas rurais ós que non se lles presta o servicio diariamente.

CAPÍTULO 4º .-COTAS TRIBUTARIAS E TARIFAS.

Artigo 9º .-Cota tributaria

1. A cota tributaria consistirá nunha cantidade fixa, por unidade de vivenda ou local, cunha contía que se determinará en función da natureza e destino dos inmobles.

2. Para tal efecto aplicarase a seguinte tarifa:

Epígrafe	Unidade	Euros
1	Vivendas familiares	59,00 euros
2	Oficinas, Bares, Comercios e pequenos Talleres, Postos da Praza de Abastos e Ultramarinos de ata 50 m ² de superficie	100,18 euros
3	Oficinas, Comercios Textis, Talleres, Hostais, Restaurantes e Supermercados de 50 ata 100 m ² de superficie; Bares e Cafeterías con terraza na vía pública; Gasolineiras.	159,68 euros
4	Bares e cafeterías de categoría especial; Entidades Bancarias; Restaurantes e Supermercados de mais de 100 m ² de superficie.	220,40 euros
5	Industrias; Discotecas e Salas de festas; Bingos; Cámpings; Talleres de mais de 250 m ² de superficie	280,51 euros
6	Vendedores ambulantes que se instalan no mercado dos sábados; Atraccións e demais establecementos similares instalados con ocasión de festas, feiras, romaría ou verbenas	30,00 euros

3. Os Epígrafes 1 e 6 sufrirán un incremento anual de 3 euros e os restantes epígrafes un incremento anual de 6 euros.

4. Para que os vendedores ambulantes e titulares de atraccións e demais establecementos de carácter temporal podan obter a autorización municipal de ocupación de vía pública será requisito imprescindible ter abonado o último recibo da taxa posta o cobro.

CAPÍTULO 5º . PERÍODO IMPOSITIVO E DEVENGO

Artigo 9º . Período Impositivo.

O período impositivo coincide co ano natural, agás cando e trate de supostos de inicio da prestación do servicio, e nese caso abranguerá desde esa data ata o remate do ano natural.

Artigo 10º . Devengo da Taxa.

1. Devéngase a taxa e nace a obriga de contribuír dende o momento no que se principie a prestación do servicio ou a realización da actividade, entendéndose principiada, dada a natureza de recepción obligatoria, cando estea establecido e en funcionamento o servicio municipal de prerecollida, recollida e tratamento de lixo e residuos sólidos urbanos e asimilables nas rúas ou lugares onde se sitúen as vivendas, locais e aloxamentos susceptibles de ser ou utilizados polos contribuíntes suxeitos á taxa.

Ós referidos efectos, no ámbito rural enténdese que está establecido o servicio cando exista un colector de recollida nun radio de 800 metros contados a partir de calquera punto do edificio, construcción ou local onde se empraza a vivenda ou se realiza a actividade.

2. Unha vez establecido i en funcionamento o referido servicio municipal, prodúcese o devengo da taxa o primeiro día de cada ano natural, con independencia do tempo de ocupación do local ou vivenda ó longo do ano e de que dita ocupación refírase á totalidade ou parte da finca. A tales efectos, considérase que un inmoble é susceptible de ser ocupado ou utilizado cando o mesmo dispoña de luz e auga, debendo o interesado acreditar documentalmente, no seu caso, a indisponibilidade dos citados subministros, procedéndose, en caso de carencia de subministro eléctrico, á devolución de ingresos indebidos, previa aportación polo interesado de certificación expedida pola empresa subministradora, referida ó período no que se estendeu a devandita carencia.

CAPITULO 6º . NORMAS DE XESTIÓN

Artigo 11.-Padrón Fiscal

Para a exacción da Taxa formarase un Padrón no que figurarán os contribuíntes afectados e as cotas respectivas.

Artigo 12.-Altas e declaracions

1. Produciranse as altas no padrón de recollida e tratamiento de residuos sólidos urbanos de vivendas coa correspondente alta a efectos do imposto sobre bens inmobilés.

De non practicarse a correspondente declaración de alta no imposto sobre bens inmobilés, estarase incorrendo en infracción cualificada como grave no artigo 79 b) da Lei 25/1995, do 20 de xullo, de modificación parcial da Lei Xeral Tributaria. Sen embargo, poderá obviarse a infracción tributaria para os efectos exclusivos da presente taxa, así como a correspondente sanción, coa presentación no Concello de instancia ou escrito no que se formula declaración de alta no padrón de taxa de recollida de lixo de vivendas.

2. En relación con locais, comerciais, industriais ou profesionais, entenderase como declaración de alta a solicitude de preceptiva licencia de actividades e instalacións, tendo efectos dende a data de concesión ou comezo efectivo da actividade. De iniciar unha actividade sen a preceptiva licencia, ademais de infracción urbanística estarase

incorrendo en infracción fiscal grave de conformidade co citado artigo 79 b) da Lei 25/1995. De forma excepcional, e sen prexuízo das sancións urbanísticas que procedan, ós servicios admitirá declaracións de alta a efectos de recollida de lixo industrial, comercial ou profesional en instancia razoada polo suxeito titular da actividade. Desta forma pode obviarse a sanción tributaria. No caso dos traspasos de negocio, o antigo e o novo titular deberán presentar copia do cambio de titularidade no Rexistro do Concello e o impreso regulamentario para tal efecto. O incumprimento desta obriga terá así mesmo, a cualificación de infracción tributaria grave para o adquirente do negocio e infracción simple para o cedente.

3. En todo caso, dentro dos trinta días soltos seguintes á data na que a taxa se devengara por primeira vez, os suxeitos pasivos formalizarán a súa inscrición no padrón, presentando, para tal efecto, a correspondente declaración de alta, e ingresando simultaneamente a cota do primeiro período impositivo. Cando o obrigado non presente a declaración de alta e o correspondente ingreso da cota, realizarase de oficio, con notificación individual o interesado, e sen prexuízo das sancións que correspondan.

4. Os locais baleiros tributarán como vivendas, previa solicitude dos suxeitos pasivos.

5. Os titulares de actividades deberán formular declaración de baixa cando cesen naquelas. O incumprimento desta obriga ten a cualificación de infracción simple.

Artigo 13. Variacións no Padrón

1. Cando se coñeza, xa sexa de oficio ou por comunicación dos interesados, calquera variación dos datos que figuran no padrón, levarase a cabo neste as modificacións correspondentes, que producirán efecto a partir do período de cobranza seguinte ó da data na que se efectuou a declaración.

2. As modificacións producidas no padrón do imposto sobre bens inmóbiles de natureza urbana ou no padrón do imposto sobre actividades económicas con efectos na taxa de recollida e tratamento de residuos sólidos urbanos, darán lugar á correspondente modificación do padrón do lixo coa mesma data na que se producirán as devanditas alteracións.

Artigo 14. Ingreso da débeda tributaria.

O cobramento das cotas dos períodos impositivos posteriores ós da alta no Padrón, efectuarase semestralmente mediante recibo derivado do Padrón da Taxa.

CAPÍTULO 7º . INFRACCIÓN S E SANCIÓNS

Artigo 15. Réxime Xeral.

1. En todo o relativo á cualificación das infraccións tributarias, así como das sancións que ás mesmas correspondan en cada caso, estarase ó disposto nos artigos 77 e seguintes da Lei Xeral Tributaria.

2. A imposición de sancións non suspenderá, en ningún caso, a liquidación e cobro das cotas devengadas.

Disposición Final

A presente Ordenanza Fiscal comenzará a aplicarse o 1 de xaneiro de 2004, unha vez feita a súa publicación íntegra no Boletín Oficial da Provincia, e permanecerá en vigor ata que o Concello acorde a súa derogación ou modificación expresa